



Sumáriu Kazu
Tribunál Distritál Oekusi¹
Janeiru 2020

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 17

Tipu kazu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika.	11
Artigu 145 KP	Ofensa ba integridade física simples	4
Artigu 258 KP	Danu simples	1
Artigu 322 KP	Explorasaun ba jogo ilísitu	1
Totál		17

2. Totál desizaun ne'ebé JSMP monitoriza : 16

Tipu desizaun	Númeru
---------------	--------

¹Kazu ho Nú Prosesu hanesan: 0007/19.OEPSB, 0004/19.OEPSB, 0005/19.OEPSB, 0008/19.OEPSB, 0021/18.OEOSL, 0007/19.OEOSL no 0005/19.OEOSL, prosesu julgamentu ba kazu hirak ne'e hala'o liuhusi tribunál movel no iha tempu hanesan halo kedas leitura sentensa tanba kestaun distánsia dook husi vila, estrada la diak no tempu udan.

Suspensaun ba prizaun nia ezekusaun (Artigu 68 KP)	11
Suspensaun ba prizaun nia ezekusaun (Artigu 68 KP) no absolve	1
Absolve	1
Omologa pedidu dezisténsia	3
Totál	16

3. Totál kazu sira ne'ebé adia tuir JSMP monitorizasaun : 1

Razaun adiamentu	Númeru
Arguidu la marka prezensa tanba moras no hela iha Dili	1
Totál	1

4. Total kazu sira ne'ebé kontinua prosesu tuir JSMP nia monitorizasaun: 0

B. Deskripsaun sumáriu julgamentu ba desizaun kazu sira

1. Krime ofensa ba integridade fízika simples ho natureza violénsia doméstika

Nú. Prosesu : 0007/19.OEPSB
 Kompozisaun Tribunál : Singulár
 Juis : Dr. Eusébio Xavier Vitor
 Prokuradór : Dr. Mateus Nesi
 Defeza : Dr. Calisto Tout
 Desizaun : Pena prizaun fulan 6 suspende ba tinan 1

Iha 08 Janeiru 2020, Tribunál Distritál Oekusi liuhusi tribunál movel iha Sub-distritu Pasabe prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu EL hasoru nia feen, iha Distritu Oekusi.

Akuzasaun Prokuradór

Prokuradór akuza arguidu katak iha 13 Abril 2019, maizumenus iha oras tuku 12.00 meiodia, arguidu tuku lezada dala ida iha matan okos parte karuk, tuku dala ida iha liman kabun parte karuk no dala ida iha liman kabun parte loos, rezulta lezada sofre moras iha matan okos parte karuk no liman kabun parte loos no karuk. Aktu ne'e akontese bainhira arguidu fila bá uma ho kondisaun lanu no diskute malu ho lezada kona-ba hare ne'ebé dulas hotu ona maibé seidak haloot. Kazu ne'e aneksa ho relatóriu médiu husi Sentru Saúde Pasabe no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to’o tinan 3 ka multa konjugadu ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa faktu hotu iha akuzasaun prokuradór nian no arrepende ona ninia hahalok. Arguidu promete ba tribunál sei la halo tan krime hasoru lezada iha futuru. Arguidu mós deklara katak dame malu kedas ho lezada, foin primeiravés komete krime no foin mai hatan iha tribunál, serbisu nu’udar agrikultór, laiha rendimentu fiksi no iha oan na’in haat.

Entretantu lezada kontinua konfirma faktu hotu iha akuzasaun no deklara katak depoisde akontesimentu ne’e lezada ho arguidu dame malu kedas no moris hamutuk hanesan feen-laen to’o agora.

Alegasaun finál

Prokuradór konsidera arguidu provadu komete agresaun fízika hasoru lezada tuir faktu sira iha akuzasaun. Tanba ne’e, husu ba tribunál atu kondena arguidu tuir pena ne’ebé define ona iha artigu 145 KP.

Entretantu defeza haktuir katak arguidu konfesa faktu hotu iha akuzasaun, arrepende ona ninia hahalok, promete sei la halo tan krime hasoru nia membru família ka ema seluk, kolabora di’ak ho tribunál, dame malu ona ho lezada, nu’udar agrikultór, laiha rendimentu fiksi no iha oan na’in haat. Tanba ne’e, husu ba tribunál atu aplika pena ne’ebé adekua ba arguidu tuir nia sala.

Desizaun

Depois avalia faktu sira hotu, tribunál prova katak arguidu tuku lezada dala ida iha matan okos parte karuk, tuku dala ida iha liman kabun parte karuk no dala ida iha liman kabun parte loos. Tribunál konsidera arguidu nia hahalok ne’e hanesan “dolu direitu” tanba tribunál prova katak arguidu iha duni intensaun atu baku lezada.

Bazeia ba faktu provadu no sirkunstánsia atenuante sira hanesan arguidu konfesa, arrepende ona nia hahalok, dame malu ona ho lezada, foin primeravés mai hatan iha tribunál, iha oan na’in haat no arguidu mak hanesan responsável masímu bá família, tanba ne’e tribunál konklui prosesu ne’e no kondena arguidu ho pena prizaun fulan neen suspende ba tinan ida.

2. Krime ofensa ba integridade fízika simples ho natureza violénsia doméstika

Nú. Prosesu	: 0004/19.OEPSB
Kompozisaun Tribunál	: Singulár
Juis	: Dr. Eusébio Xavier Vitor
Prokuradór	: Dr. Mateus Nesi
Defeza	: Dr. Calisto Tout

Desizaun

: Pena prizaun fulan 6 suspende ba tinan 1

Iha 08 Janeiro 2020, Tribunál Distritál Oekusi liuhusi tribunál movel iha Sub-distritu Pasabe prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MN hasoru nia feen, iha Distritu Oekusi.

Akuzasaun Prokuradór

Prokuradór akuza arguidu katak iha 05 Feveireiru 2019, iha oras tuku 23.30 kalan, arguidu basa lezada dala ida iha hasan parte karuk no tuku dala ida iha mós hasan parte karuk rezulta moras. Antes aktu ne'e akontese, arguidu no lezada diskute malu kona-ba sira nia oan ne'ebé tanis tanba moras. Kazu ne'e aneksa ho relatóriu médiku husi Sentru Saúde Pasabe no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa parsialmente ba faktu sira iha akuzasaun no deklarata katak basa duni lezada dala ida iha hasan parte karuk maibé la tuku lezada iha hasan. Arguidu mós deklarata katak arrepende ona ninia hahalok, arguidu nu'udar agrikultór, laiha rendimentu fíksu, iha oan na'in ida, dame malu ona ho lezada no foin primeiravés komete krime inklui foin mai hatan iha tribunál.

Entretantu lezada kontinua konfirma faktu hotu iha akuzasaun katak arguidu basa duni lezada dala ida iha hasan parte karuk no tuku dala ida iha hasan parte karuk rezulta moras. Lezada mós deklarata katak depoisde akontesimentu, sira di'ak malu kedas no to'o agora moris hamutuk nafatin hanesan feen ho la'en.

Alegasaun finál

Prokuradór haktuir katak mezmua arguidu konfesa parsialmente ba faktu sira maibé lezada kontinua konfirma faktu hotu iha akuzasaun. Tanba ne'e, husu ba tribunál atu kondena arguidu tuir artigu ne'ebé hakerek ona iha akuzasaun prokuradór nian.

Entretantu, defeza husu ba tribunál atu kondena arguidu ho pena ne'ebé adekua tanba iha produsaun ba prova arguidu kolabora di'ak ho tribunál no konfesa faktu parsialmente. Arguidu mós arrepende ona ninia hahalok, iha oan na'in ida, di'ak malu ona ho lezada, foin primeiravés halo krime no mai hatan iha tribunál no arguidu mós serbisu nu'udar agrikultór ne'ebé laiha rendimentu fíksu.

Desizaun

Depoizde avalia faktu hotu, tribunál prova katak arguidu basa lezada dala ida iha hasan parte karuk no tuku dala ida iha mós ha san parte karuk tuir faktu sira iha akuzasaun. Tribunál bazeia ba lezada nia deklarasaun, relatóriu médiku no fotografia husi polísia.

Bazeia ba faktu provadu sira no sirkunstánsia sira hotu, tribunál konklui prosesu ne'e no kondena arguidu ho pena prizaun fulan neen suspende ba tinan ida.

3. Krime ofensa ba integridade fízika simples ho natureza violénsia doméstika

Nú. Prosesu : 0005/19.OEPSB
Kompozisaun Tribunál : Singulár
Juis : Dr. Eusébio Xavier Vitor
Prokuradór : Dr. Mateus Nesi
Defeza : Dr. Calisto Tout
Desizaun : Pena prizaun fulan 6 suspende ba tinan 1

Iha 08 Janeiru 2020, Tribunál Distritál Oekusi liuhusi tribunál movel iha Sub-distritu Pasabe prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DM hasoru nia feen, iha Distritu Oekusi.

Akuzasaun Prokuradór

Prokuradór akuza arguidu katak iha 14 Marsu 2019, iha oras tuku 07:30 dadeer, arguidu basa lezada dala rua iha hasan parte karuk no basa dala rua iha hasan parte loos kauza mean, bubu no moras iha hasan parte karuk no loos. Antes ne'e, arguidu haree lezada halo tratamentu ladi'ak hasoru arguidu nia oan na'in tolu (oan husi feen primeiru) no arguidu fó hanoín bá lezada atu la bele halo hanesan ne'e maibé lezada lakohi halo tuir. Ho nune'e sira diskute malu no arguidu halo agresaun refere hasoru lezada. Kazu ne'e aneksa ho relatóriu médiku husi Sentru Saúde Pasabe no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa faktu hotu iha akuzasaun no deklara katak arrepende ona ninia hahalok. Arguidu promete sei la halo tan hahalok hanesan hasoru lezada iha futuru. Arguidu mós deklara katak dame malu ona ho lezada, primeiravés komete krime no foin mai hatan iha tribunál, iha oan na'in haat husi feen na'in rua ne'e no serbisu hanesan seguransa sivíl ho saláriu kada fulan US\$166.00

Tribunál bazeia ba pedidu husi prokuradór, presinde lezada nia deklarasaun tanba iha audénsia julgamentu arguidu konfesa faktu integralmente no husi parte defeza konkorda pedidu ne'e.

Alegasaun final

Prokuradór konsidera arguidu provadu halo agresaun fízika hasoru lezada tuir faktu sira iha akuzasaun. Tanba ne'e, husu ba tribunál atu kondena arguidu tuir pena ne'ebé define iha artigu 145 KP.

Entretantu defeza husu ba tribunál atu aplika pena ne'ebé kmaan ba arguidu ho konsiderasaun katak durante iha produsaun ba prova arguidu konfesa faktu hotu iha akuzasaun, arrepende ona nia hahalok no agresaun ne'e mosu tanba provokasaun husi lezada. Arguidu promete sei la halo tan krime hasoru nia membru família ka ema seluk, kolabora di'ak ho tribunál, dame malu ona ho lezada no sira iha oan na'in haat.

Desizaun

Depois avalia faktu hotu, tribunál prova katak arguidu basa lezada dala rua iha hasan parte karuk no dala rua iha hasan parte loos. Tribunál prova bazeia ba deklarasaun arguidu, lezada inklui relatóriu médiku no fotografia husi polísia. Bazeia ba prova sira no sirkunstánsia sira hotu, tribunál kondena arguidu ho pena prizaun fulan neen suspende ba tinan ida.

4. Krime ofensa ba integridade fízika simples ho natureza violénsia doméstika

Nú. Prosesu : 0008/19.OEPSB
Kompozisaun Tribunál : Singulár
Juis : Dr. Eusébio Xavier Vitor
Prokuradór : Dr. Mateus Nesi
Defeza : Dr. Calisto Tout
Desizaun : Pena prizaun fulan 6 suspende ba tinan 1

Iha 08 Janeiru 2020, Tribunál Distritál Oekusi liuhusi tribunál movél iha Sub-distritu Pasabe prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JU hasoru nia feen, iha Distritu Oekusi.

Akuzasaun Prokuradór

Prokuradór akuza arguidu katak iha 18 Abril 2019, iha oras tuku 13:00 meiodia, arguidu tuku lezada dala tolu iha ulun no basa lezada dala rua iha hasan parte karuk no loos no rezulta bubu, metan, mean no moras iha ulun no hasan parte loos no karuk. Antes ne'e, lezada nia maun ba fó hatene lezada ho arguidu kona-ba lia moris maibé arguidu lakohi bá tanba osan laiha. Ho nune'e sira diskute malu no arguidu halo agresaun ne'e hasoru lezada. Depois akontesimentu ne'e, lezada ba halo tratamentu iha Sentru Saúde Pasabe no fotografia husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklarata katak arrepende ona ninia hahalok, foin primeiravés komete krime inklui foin mai hatan iha tribunál. Arguidu mós deklarata katak di'ak malu ona ho lezada no sira iha oan na'in ida, hanesan agrikultór no laiha rendimentu fiksi. Arguidu promete sei la halo tan agresaun hasoru lezada.

Bazeia ba prokuradór nia pedidu no hetan konkordánsia husi defeza, tribunál presinde lezada nia deklarasaun tanba iha audénsia julgamentu arguidu konfesa faktu sira integralmente.

Alegasaun final

Prokuradór konsidera arguidu provadu prátika krime tuir faktu sira iha akuzasaun no konsidera mós katak arguidu laiha edukasaun no la respeita lezada nu'udar nia feen. Tanba ne'e, husu ba tribunál atu kondena arguidu tuir moldura penál iha artigu 145 KP.

Entretantu defeza husu ba tribunál atu kondena arguidu ho pena ne'ebé adekuadu tanba arguidu konfesa integralmente ba faktu sira, arrepende ona ninia hahalok no promete sei la komete tan krime hasoru lezada iha futuru, foin primeiravés komete krime no foin mai hatan iha tribunál.

Desizaun

Depoizde avalia faktu hotu, tribunál prova katak arguidu tuku lezada dala tolu iha ulun no basa lezada dala rua iha hasan parte karuk no loos. Faktu provadu ne'e konfirmadu ho relatóriu médiku no fotografia husi polísia.

Bazeia ba faktu provadu sira no konsidera sirkunstánsia sira hotu, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

5. Krime ofensa ba integridade fízika simples

Nú. Prosesu	: 0013/19.OEOSL
Kompozisaun Tribunál	: Singulár
Juis	: Dr. Eusébio Xavier Vitor
Prokuradór	: Dr. Matias Soares
Defeza	: Dr. Marcelino Marques Coro
Desizaun	: Omologa pedidu dezisténsia keixa

Iha 09 Janeiro 2020, Tribunál Distritál Oekusi liuhusi tribunál movel iha Sub-Distritu Oesilo prezide julgamentu tentativa konsiliaun ba krime ofensa ba integridade fízika simples ne'ebé

envolve arguida Maria Samamo no arguidu Domingos Timo, Elias Lalus no Fernando Timo hasoru lezadu Jose Bobo, iha Suku Bobometo Sub-distritu Oesilo, Distritu Oekusi.

Akuzasaun Prokuradór

Prokuradór akuza arguida no arguidu sira katak iha 05 Juñu 2019, iha oras tuku 13:00 meudia, arguidu Elias Lalus aperta metin lezadu no arguidu sira seluk tuku no tebe dala barak iha lezadu nia kotuk laran no liman kabun parte karuk no kelen parte karuk no loos. Agresaun ne'e rezulta lezadu sofre moras, mean no bubu. Antes akontese agresaun ne'e, arguida deskute malu ho lezadu kona-ba dada bee husi tenki bo'ot ba ida-idak nia uma to'o arguida bolu arguidu sira seluk. Hafoin akontesimentu ne'e, lezadu ba halo tratamentu iha Sentru Saúde Oesilo no fotografia husi polísia.

Prokuradór akuza arguida no arguidu sira kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Bazeia ba artigu 262 Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguida no arguidu sira ho lezadu.

Iha prosesu konsiliaun ne'e, lezadu hakarak dame malu ho arguida no arguidu sira sein kondisaun ruma. Aleinde ne'e, arguida ho arguidu sira konkorda ho pedidu lezadu nian. Arguida ho arguidu sira mós deklara katak arrepende ona sira nia hahalok no promete sei la repete tan hahalok hanesan iha futuru, nune'e lezadu husu ba tribunál atu deziste tiha ninia-keixa hasoru arguida ho arguidu sira.

Alegasaun final

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu dame hosi parte rua no pedidu dezisténsia hosi lezadu, tribunál konklui prosesu ne'e no omologa akordu dame ba prosesu refere sein kondisaun ruma.

6. Krime danu simples

Nú. Prosesu	: 0014/19.OEOSL
Kompozisaun Tribunál	: Singulár
Juis	: Dr. Eusébio Xavier Vitor
Prokuradór	: Dr. Matias Soares
Defeza	: Dr. Marcelino Marques Coro

Desizaun : Omologa pedidu dezistensia keixa

Iha 09 Janeiro 2020, Tribunál Distritál Oekusi liuhusi tribunál movel iha Sub-distritu Oesilo prezide julgamentu tentativa konsiliaun ba krime danu simples ne'ebé envolve arguidu Jose Bobo hasoru lezadu Domingos Timo, iha Suku Bobometo Sub-distritu Oesilo, Distritu Oekusi.

Akuzasaun Prokuradór

Prokuradór akuza arguida katak iha 05 Juñu 2019, iha oras tuku 12:00 meiodia, arguidu uza katana taa kotu *polypipe (pipa)* ne'ebé pertensia ba lezadu. Arguidu nia hahalok ne'e prejudika lezadu la bele asesu ba be-moos husi tenki jerál nian.

Prokuradór akuza arguidu kontra artigu 258 KP kona-ba danu simples ho moldura penál to'otinan 2 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, lezadu hakarak dada fali nia-keixa sein kondisaun ruma. Enkuantu arguidu konkorda ho lezadu nia pedidu dezisténsia keixa ne'e no promete sei la repete tan hahalok hanesan iha futuru hasoru lezadu, nune'e lezadu husu ba tribunál atu deziste ninia-keixa hasoru arguidu.

Alegasaun final

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténsia keixa hosi lezadu, tribunál konklui prosesu ne'e no omologa akordu dame entre parte sira ba prosesu refere sein kondisaun ruma.

7. Krime ofensa ba integridade física simples

Nú. Prosesu : 0012/19.OEOSL
Kompozisaun Tribunál : Singulár
Juis : Dr. Eusébio Xavier Vitor
Prokuradór : Dr. Matias Soares
Defeza : Dr. Marcelino Marques Coro
Desizaun : Omologa pedidu dezistensia keixa

Iha 09 Janeiru 2020, Tribunál Distritál Oekusi liuhusi tribunál movél iha Sub-distritu Oesilo prezide julgamentu tentativa konsiliaisaun ba krime ofensa ba integridade fízika simples ne'ebé envolve arguida Esperanca da Costa hasoru lezada Domingas Cofan, iha Suku Bobometo Sub-distritu Oesilo, Distritu Oekusi.

Akuzasaun Prokuradór

Prokuradór akuza arguida katak iha 24 Maiu 2019, iha oras tuku 08:00 dadeer, arguida buti dala ida iha lezada nia kakorok, uza ai-sar baku lezada dala ida iha liman kabun parte karuk no uza balde ki'ik ida baku dala rua iha reen-toos. Agresaun fízika ne'e rezulta lezada sofre moras, mean, bubu no kanek. Antes ne'e, arguida deskonfia lezada konta arguida nia hahalok sira ba ema seluk. Nune'e sira diskute malu no arguida komete agresaun refere hasoru lezada. Hafoin akontesimentu ne'e, lezada ba halo tratamentu médiku iha Sentru Saúde Oesilo no fotografia husi polísia.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaisaun, nune'e antes tama ba julgamentu produsaun ba prova, juis husu atu halo tentativa konsiliaisaun ba arguida no lezada.

Iha prosesu konsiliaisaun ne'e, lezada hakarak dame malu no dada fali nia-keixa maibé ho kondisaun arguida tenke fó indemnizasaun sivíl ho valór osan US\$70.00 ba lezada. Arguida konkorda no sei fó indemnizasaun sivíl tuir pedidu lezada nian. Arguida mós deklara arrepente ona ninia hahalok no promete sei la repete tan hahalok hanesan iha futuru, nune'e lezada husu ba tribunál atu deziste ninia-keixa hasoru arguida.

Alegasaun final

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténsia hosi lezada, tribunál konklui prosesu ne'e no omologa akordu dame entre parte sira. Iha tempu hanesan arguida entrega kedas osan ho montante US\$70.00 ba lezada.

8. Krime ofensa ba integridade fízika simples ho natureza violénsia doméstika

Nú. Prosesu : 0021/18.OEOSL
Kompozisaun Tribunál : Singulár
Juis : Dr. Eusébio Xavier Vitor

Prokuradór : Dr. Matias Soares
Defeza : Dr. Marcelino Marques Coro
Desizaun : Pena prizaun tinan 1 suspende ba tinan 2

Iha 10 Janeiro 2020, Tribunál Distritál Oekusi liuhusi tribunál movel iha Sub-distritu Oesilo prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu RT hasoru nia feen, iha Distritu Oekusi.

Akuzasaun Prokuradór

Prokuradór akuza arguidu katak iha 12 Novembru 2018, iha oras tuku 11:00 dadeer, arguidu uza knuk katana nian no baku lezada dala ida iha reen-toos rezulta kanek no ran sai. Antes ne'e, arguidu fó hatene lezada atu arguidu mai Dili hodi buka osan maibé lezada lakohi. Nune'e mosu agresaun refere. Kazu ne'e aneksa ho relatóriu médiku husi Sentru Saúde Oesilo no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun prokuradór nian no deklara arrepende ona nia hahalok, promete sei la halo tan hahalok hanesan hasoru lezada iha futuru, dame malu ona, foin primeiravés komete krime hasoru lezada no foin mai hatan iha tribunál. Arguidu hatutan katak hanesan agrikultór, laiha rendimentu fiksi, no iha oan na'in rua.

Tribunál presinde atu la rona deklarasaun lezada nian tanba arguidu konfesa integralmente ba faktu sira hotu iha akuzasaun.

Alegasaun finál

Prokuradór konsidera arguidu provadu halo agresaun fízika hasoru lezada tuir faktu sira iha akuzasaun bazeia ba arguidu nia konfisaun. Nune'e, atu halo prevensaun iha futuru atu arguidu la komete tan krime hasoru lezada, husu ba tribunál atu kondena arguidu ho pena prizaun tinan ida fulan neen suspende ba tinan rua.

Enkuantu defeza haktuir katak arguidu konfesa intregalmente ba faktu sira iha akuzasaun, arrepende ninia hahalok, dame malu ona ho lezada, kolabora ho tribunál, promete sei la halo tan krime hasoru nia membru família ka ema seluk iha futuru. Bazeia ba sirkunstánsia sira ne'e hotu, defeza husu ba tribunál atu aplika pena ne'ebé kmaan ba arguidu.

Desizaun

Depoisde avalia no tetu faktu sira hotu, tribunál prova katak arguidu uza duni katana nia knuk hodi baku lezada dala ida iha reen-toos. Bazeia ba faktu provadu ne'e no sirkunstánsia sira hotu, tribunál konklui prosesu ne'e no kondena arguidu ho pena prizaun tinan ida suspende ba tinan rua.

9. Krime ofensa ba integridade fízika simples ho natureza violénsia doméstika

Nú. Prosesu : 0007/19.OEOSL
Kompozisaun Tribunál : Singulár
Juis : Dr. Eusébio Xavier Vitor
Prokuradór : Dr. Matias Soares
Defeza : Dr. Marcelino Marques Coro
Desizaun : Pena prizaun tinan 1 suspende ba tinan 1

Iha 10 Janeiru 2020, Tribunál Distritál Oekusi liuhusi tribunál movel iha Sub-distritu Oesilo prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JAC hasoru nia feen, iha Distritu Oekusi.

Akuzasaun Prokuradór

Prokuradór akuza arguidu katak iha 11 Abril 2019, iha oras tuku 14:00 meiodia, arguidu ho lezada diskute malu kona-ba atu kuda modo maibé lezada dehan katak nia sei ba hare uluk nia inan-aman sira. Ho nune'e, arguidu tuku lezada dala tolu iha reen-toos, tuku dala ida iha matan parte loos no uza ai-pedasuk ida baku dala tolu iha kotuk laran. Arguidu nia agresaun fízika ne'e rezulta lezada sofre moras iha reen-toos, matan parte loos no kotuk laran. Kazu ne'e aneksa ho relatóriu médiku husi Sentru Saúde Oesilo no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu sira hotu iha akuzasaun no deklarata katak arguidu arrepende ninia hahalok, di'ak malu ona ho lezada, foin primeiravés komete krime hasoru lezada no foin mai hatan iha tribunál, nu'udar agrikultór, laiha rendimentu fiksi no iha oan na'in ida.

Entretantu lezada kontinua konfirma faktu sira iha akuzasaun inklui deklarasaun arguidu nian katak sira dame malu ona. Lezada mós haktuir tan katak depoisde akontesimentu to'o agora arguidu la baku ona lezada.

Alegasaun final

Prokuradór konsidera arguidu provadu komete krime hasoru lezada tuir faktu sira iha akuzasaun prokuradór nian. Maske arguidu di'ak malu ona ho lezada, maibé haree ba realidade katak krime violénsia doméstika kontinua akontese iha Oekusi, nune'e husu ba tribunál atu kondena arguidu ho pena prizaun tinan ida fulan neen suspende ba tinan rua tuir artigu 145 KP konjugadu ho LKVD.

Entretantu, defeza husu ba tribunál atu kondena arguidu ho pena ne'ebé adekua ho konsiderasaun katak arguidu konfesa integralmente ba faktu sira, oan na'in ida, arrepende ninia hahalok no kolabora di'ak ho tribunál. Arguidu mós di'ak malu ona ho lezada, primeiravés komete krime hasoru lezada no foin mai hatan iha tribunál.

Desizaun

Depoisde avalia faktu hotu, tribunál prova katak arguidu tuku lezada dala tolu iha reen-toos, tuku dala ida iha matan parte loos no uza ai-pedasuk baku dala tolu iha kotuk laran ne'ebé konfirmadu husi arguidu nia deklarasaun rasik.

Bazeia ba provadu sira no sirkunstánsia atenuante sira ne'e hotu no tetu ba arguidu nia arrependimentu, primeiravés mai hatan iha tribunál, di'ak malu ona, iha oan na'in ida no laiha rendimentu fiksi, tribunál konklui prosesu ne'e no kondena arguidu ho pena prizaun tinan ida suspende ba tinan ida.

10. Krime ofensa ba integridade fízika simples ho natureza violénsia doméstika

Nú. Prosesu : 0005/19.OEOSL
Kompozisaun Tribunál : Dr. Eusébio Xavier Vitor
Prokuradór : Dr. Matias Soares
Defeza : Dr. Marcelino Marques Coro
Desizaun : Pena prizaun tinan 1 suspende ba tinan 1

Iha 10 Janeiru 2020, Tribunál Distritál Oekusi liuhusi tribunál movel iha Sub-distritu Oesilo prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AESC hasoru nia feen, iha Distritu Oekusi.

Akuzasaun Prokuradór

Prokuradór akuza aguidu katak iha 08 Marsu 2019, iha oras tuku 22:00 kalan, arguidu tebe lezada dala ida iha kidun, sama iha kotuk laran no tuku dala ida iha lezada nia liman kabun parte loos, rezulta lezada hetan bubu, metan, mean no moras iha kidun, kotuk laran no liman kabun parte loos. Antes ne'e, arguidu fila husi merkadu no la sosa bua ho malus ba lezada. Ho nune'e sira diskute malu no arguidu komete agresaun hirak ne'e hasoru lezada. Kazu ne'e aneksa ho relatóriu médiku husi Sentru Saúde Oesilo no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa no konjuga ho artigu 2, 3(b), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira hotu iha akuzasaun no deklara katak arrepende ninia hahalok, foin primeiravés komete krime, foin mai hatan iha tribunál no promote sei la komete tan krime hasoru lezada. Arguidu mós deklara katak serbisu nu'udar argrikultór, laiha rendimentu fiksi, di'ak malu ona ho lezada, iha oan na'in rua no arguidu mak responsavél úniku ba sustensa nesesidade família uma laran.

Aleinde ne'e, lezada kontinua konfirma faktu sira iha akuzasaun no deklara katak depoisde akontesimentu to'o agora arguidu la halo ona agresauun hasoru lezada.

Alegasaun finál

Prokuradór konsidera arguidu provadu prátika krime tuir faktu sira iha akuzasaun no konsidera arguidu nia hahalok ne'e hatudu katak arguidu laiha edukasaun no la respeita lezada nu'udar nia feen. Tanba ne'e, husu ba tribunál atu kondena arguidu ho pena prizaun tinan ida fulan neen no suspende ba tinan rua.

Entretantu defeza husu ba tribunál atu kondena arguidu ho pena ne'ebé adekuaudu tanba arguidu konfesa integralmente ba faktu sira, arrepende ona ninia hahalok no promote sei la halo tan krime hasoru lezada iha futuro. Arguidu mós primeiravés komete krime no foin mai hatan iha tribunál no iha oan na'in rua.

Desizaun

Depoisde avalia faktu hotu, tribunál prova katak arguidu halo duni agresauun hasoru lezada hanesan tebe, sama no tuku lezada. Bazeia ba faktu provadu sira no tetu ba sirkunstánsia agravante no atenuante sira ne'ebé haleu iha krime ne'e, tribunál kondena arguidu ho pena prizaun tinan ida suspende tinan ida.

11. Krime ofensa ba integridade fízika simples ho natureza violénsia doméstika

Nú. Prosesu	: 0023/18.OEPSB
Kompozisaun Tribunál	: Singulár
Juis	: Dr. Eusébio Xavier Vitor
Prokuradór	: Dr. Mateus Nesi
Defeza	: Dr. Calisto Tout
Desizaun	: Absolve

Iha 22 Janeiru 2020, Tribunál Distritál Oekusi prezide leitura sentensa ba krime ofensa ba integridade física simples ho natureza violénsia doméstika ne'ebé envolve arguidu BP hasoru nia alin feto, iha Distritu Oekusi.

Akuzasaun Prokuradór

Prokuradór akuza arguidu katak iha 06 Novembru 2018, iha oras tuku 17:30 lokraik, arguidu basa dala ida iha lezada nia hasan parte karuk, tuku dala ida iha hasan parte loos, buti iha kakorok, riba lezada ba uma didin (*piku*) no tebe dala ida iha kotuk laran. Arguidu tenta atu ta'a lezada ho katana maibé la konsege tanba lezada halai no husu ajuda ba ME no arguidu mós halai husik hela lezada. Arguidu nia agresaun ne'e rezulta lezada sofre moras, bubu no mean. Kazu ne'e aneksa ho relatóriu médiku husi Sentru Saúde Pasabe no fotografia husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(d), 35(b) no 36 LKVD.

Produsaun ba prova sira

Iha julgamentu, arguidu hili direitu nonook. Entretantu lezada kontinua konfirma faktu hotu iha akuzasaun no deklara katak arguidu nu'udar lezada nia maun no durante sira hela hamutuk lezada mak tau matan ba arguidu tanba arguidu sofre moras deficiente psíkika desde kiik to'o agora.

Testemuña ME nu'udar lezada nia viziñu depoimenta katak loos duni arguidu halo agresaun física hasoru lezada no tenta atu ta'a lezada maibé testamuña mak impede arguidu nia asaun ne'e. Testemuña reforsa katak arguidu desde ki'ik moras psíkika ona to'o agora. Testemuña hatutan katak kuandu moras ne'e mai iha tempu fulan lotuk, arguidu sempre halo agresaun. Depoimentu ne'e konfirma mós ho testemuña JO nu'udar lezada nia viziña.

Alegasaun final

Prokuradór konsidera arguidu provadu komete krime hasoru lezada maski arguidu nia kondisaun hanesan ema ne'ebé moras deficiente psíkika. Tuir artigu 21 KP kona-ba inimputabilidade tanba anomalia psíkika, tribunál bele konsidera arguidu nia kondisaun ne'e tanba arguidu sofre duni moras psíkika no husu ba tribunál atu aplika medida apropriadu ba arguidu, nune'e la repete tan hahalok hanesan iha futuru. Entretantu, defeza konkorda ho alegasaun husi prokuradór no husu atu absolve arguidu husi krime ne'e.

Desizaun

Tribunál prova katak arguidu provadu basa dala ida iha lezada nia hasan parte karuk, tuku dala ida iha hasan parte loos, buti iha kakorok, riba lezada ba uma didin (*piku*) no tebe dala ida iha kotuk laran. Tribunál mós prova katak arguidu tenta atu ta'a lezada ho katana maibé la konsege tanba lezada halai no husu ajuda ba ME no arguidu mós halai husik hela lezada. Aleinde deklarasaun husi lezada, no testemuña sira, tribunál mós prova katak arguidu sofre duni moras

deficiente psíkika husi relatóriu médiku husi *Departementu Controla Doenca Contagioza e Não Contagioza*. Bazeia ba faktu provadu sira ne'e no tetu mós sirkunstánsia sira hotu, tribunál absolve arguidu husi aktu krime ne'e tuir artigu 21 KP kona-ba inimputabilidade tanba anomalia psíkika.

12. Krime ofensa ba integridade fízika simples ho natureza violénsia doméstika

Nú. Prosesu : 0023/18.OEOSL
Kompozisaun Tribunál : Singulár
Juis : Dr. Eusébio Xavier Vitor
Prokuradór : Dr. Matias Soares
Defeza : Dr. Marcelino Marques Coro
Desizaun : Pena prizaun tinan 1 suspende ba tinan 1

Iha 22 Janeiro 2020, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida EC hasoru nia la'en, iha Distritu Oekusi.

Akuzasaun Prokuradór

Prokuradór akuza arguida katak iha 11 Dezembru 2018, iha oras tuku 20:30 kalan, arguida basa lezadu dala tolu iha oin no dala rua ihaulun kauza lezadu sofre moras iha oin no ulun. Aktu ne'e akontese bainhira lezadu fila mai uma ho kondisaun lanu. Kazu ne'e aneksa ho relatóriu médiku husi Sentru Saúde Oesilo no fotografia husi polísia.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguida konfesa faktu hotu iha akuzasaun prokuradór nian no deklarara arrepende ona ba nia hahalok, serbisu *swasta* (loke restorante) ho rendimentu kada fulan US\$50.00 to'o US\$100.00, promete sei la halo tan krime hasoru nia laen iha futuru no dame malu kedas ho lezadu. Antes ne'e arguida hetan ona suspensaun ba pena ba krime kontrabandu.

Bazeia ba pedidu husi prokuradór ne'ebé hetan konkordánsia husi defeza konkorda, tribunál presinde lezadu nia deklarasaun tanba iha produsaun ba prova arguida rasik konfesa.

Alegasaun finál

Prokuradór konsidera arguida provadu halo agresaun fízika hasoru lezadu tuir faktu sira iha akuzasaun. Tanba ne'e, husu ba tribunál atu kondena arguidu tuir pena ne'ebé define iha artigu 145 KP.

Entretantu defeza haktuir katak arguida konfesa faktu hotu iha akuzasaun no arrepende ona ninia hahalok no promete sei la halo tan krime hasoru nia membru família ka ema seluk. Arguidu mós kolabora di'ak ho tribunál, dame malu ona ho lezadu, serbisu nu'udar *swasta* (loke restaurante) ho rendimentu ne'ebé ladun fiksi no iha oan na'in haat. Tanba ne'e, husu ba tribunál atu aplika pena ne'ebé kmaan ba arguida tuir nia sala.

Desizaun

Depois avalia faktu hotu, tribunál provadu katak arguida basa lezadu dala tolu iha oin no dala rua iha ulun no konfirmadu ho relatóriu médiku husi Sentru Saúde Oesilo no fotografia husi polícia. Bazeia ba prova sira no konsidera sirkunstánsia agravante no atenuante sira, tribunál konklui prosesu ne'e no kondena arguida ho pena prizaun tinan ida suspende ba tinan ida.

13. Krime ofensa ba integridade física simples ho natureza violência doméstica

Nú. Prosesu : 0001/19.OEOSL
Kompozisaun Tribunál : Singulár
Juis : Dr. Eusébio Xavier Vitor
Prokuradór : Dr. Matias Soares
Defeza : Dr. Marcelino Marques Coro
Desizaun : Pena prizaun tinan rua suspende ba tinan rua

Iha 23 Janeiro 2020, Tribunál Distritál Oekusi prezide leitura sentensa ba krime ofensa ba integridade física simples ho natureza violência doméstica ne'ebé envolve arguidu SC hasoru nia feen, iha Distritu Oekusi.

Akuzasaun Prokuradór

Prokuradór akuza arguidu katak iha 01 Janeiro 2019, iha oras tuku 08:00 dadeer, arguidu tuku lezada dala tolu iha ibun no uza sapatu baku dala ida iha kotuk laran kauza lezada sofre moras. Antes agresaun ne'e, arguidu ba fó boas-festa iha nia feen ki'ik no fila ba uma ho kondisaun lanu. Ho nune'e, arguidu no lezada diskute malu to'o mosu agresaun refere. Kazu ne'e aneksa ho relatóriu médiku husi Sentru Saúde Oesilo no fotografia husi polícia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun prokuradór nian no arrepende ona ba nia hahalok. Arguidu mós deklara katak agora dadaun nia moris hamutuk ho nia feen ki'ik, seidak dame malu ho lezada nu'udar nia feen boot no iha oan na'in tolu husi feen boot. Arguidu hanesan motorista *bemo* ho rendimentu kada fulan U\$100.00 no hakarak nafatin moris hamutuk ho nia feen bo'ot. Arguidu mós antes ne'e hetan ona suspensaun ba pena prizaun ba krime kontrabandu.

Entretantu lezada kontinua konfirma faktu hotu iha akuzasaun no deklarata katak lezada lakohi ona atu moris hamutuk ho arguidu tanba tinan ida liu ona arguidu la tau-matan ba lezada ho nia oan na'in tolu.

Alegasaun final

Prokurador konsidera katak arguidu prova duni halo agresan fizika hasoru lezada ho intensaun atu husik lezada ho nia oan sira no hola fali feen ki'ik. Arguidu nia hahalok ne'e prejudika tebes lezada nia fizika, ekonómia, biolójia no psikolójia. Tanba ne'e, husu ba tribunál atu kondena arguidu ho pena prizaun tinan tolu suspende ba tinan tolu.

Entretantu, defeza husu ba tribunál atu kondena arguidu ho pena ne'ebé kmaan ho konsiderasaun katak iha produsaun ba prova arguidu kolabora di'ak ho tribunál no konfesa faktu hotu iha akuzasaun. Arguidu mós arrepende ona ba nia hahalok, iha oan na'in tolu no seidauk di'ak malu ho lezada no arguidu serbisu hanesan motorista *bemo* ho rendimentu fiksi kada fulan US\$100.00.

Desizaun

Depoizide avalia faktu sira hotu, tribunál prova katak arguidu tuku lezada dala tolu ihaibun no uza sapatu baku dala ida iha lezada nia kotuk laran. Bazeia ba faktu provadu hirak ne'e no tetu mós sirkunstansia agravante no atenuante sira, tribunál konklui prosesu ne'e no kondena arguidu ho pena prizaun tinan rua suspende ba tinan rua.

14. Krime ofensa ba integridade fizika simples ho natureza violénsia doméstika

Nú. Projesu	: 0011/19.OEOSL
Kompozisaun Tribunál	: Singulár
Juis	: Dr. Eusébio Xavier Vitor
Prokurador	: Dr. Matias Soares
Defeza	: Dr. Marcelino Marques Coro
Desizaun	: Pena prizaun tinan 1 suspende ba tinan 2

Iha 23 Janeiru 2020, Tribunál Distritál Oekusi prezide leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu PO hasoru nia feen, iha Distritu Oekusi.

Akuzasaun Prokurador

Prokurador akuza arguidu katak iha 30 Maiu 2019, iha oras tuku 14:00 meiodia, arguidu diskonfia lezada amante ho mane seluk no arguidu tebe lezada dala tolu iha kotuk laran halo lezada desmaia no monu tun ba rai. Kazu ne'e aneksa ho relatóriu médiku husi Sentru Saúde Oesilo no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa faktu sira hotu iha akuzasaun prokuradór nian no arrepende ona ninia hahalok. Arguidu serbisu nu'udar agrikultór laiha rendimentu fíksu no to'o agora seidak dame malu ho lezada no iha oan na'in haat. Antes ne'e, iha 2014 arguidu halo ona krime hasoru lezada. Arguidu haktuir tan katak sei hadomi nia feen no hakarak atu moris hamutuk filafali ho lezada.

Nune'e mós lezada kontinua konfirma faktu sira iha akuzasaun no deklarata katak lakohi ona atu moris hamutuk ho arguidu tanba arguidu sempre halo agresaun fízika hasoru lezada mezmu iha arguidu nia deklarasaun sei nafatin hadomi lezada no hakarak atu moris hamutuk nafatin ho lezada.

Alegasaun finál

Prokuradór konsidera arguidu provadu halo agresaun fízika hasoru lezada tuir faktu sira akuzasaun. Tanba ne'e, husu ba tribunál atu kondena arguidu ho pena prizaun tinan rua suspende ba tinan rua.

Entretantu defeza haktuir katak arguidu konfesa faktu sira hotu iha akuzasaun no arrepende ona nia hahalok, promete sei la komete tan krime hasoru nia membru família ka ema seluk, kolabora di'ak ho tribunál, seidak dame malu tanba lezada mak lakohi dame ho arguidu. Tanba ne'e, husu ba tribunál atu aplika pena ne'ebé kmaan ba arguidu tuir nia sala.

Desizaun

Depoide tetu no avalia faktu hotu, tribunál prova katak arguidu tebe lezada dala tolu iha kotuk laran to'o desmaia, konfirmadu ho arguidu nia konfiksaun perante tribunál inklui ho relatóriu médiku husi Sentru Saúde Oesilo no fotografia husi Polísia.

Bazeia ba faktu provadu hirak ne'e no tetu mós ba sirkunstánsia agravante no atenuante sira hanesan arguidu konfesa no arrepende ona ninia hahalok, tribunál konklui prosesu ne'e no kondena arguidu ho pena prizaun tinan ida suspende ba tinan rua.

15. Krime ofensa ba integridade fízika simples

Nú. Prosesu	: 0004/19.OEOSL
Kompozisaun Tribunál	: Singulár
Juis	: Dr. Eusébio Xavier Vitor
Prokuradór	: Dr. Matias Soares
Defeza	: Dr. Marcelino Marques Coro

Desizaun

: Pena prizaun tinan 1 suspende ba tinan 1 no absolve

Iha 23 Janeiro 2020, Tribunál Distritál Oekusi prezide julgamentu leitura sentensa ba krime ofensa ba integridade fízika simples ne'ebé envolve arguidu Abilio Bobo, Agostinho Bobo Liu no Mateus Colo hasoru lezadu Tomas da Costa, iha Distritu Oekusi.

Akuzasaun Prokuradór

Prokuradór akuza arguidu sira katak iha 19 Feveireu 2019, iha oras tuku 20:00 kalan, arguidu Abilio tuku lezadu dala tolu iha hirus matan kauza lezadu sofre moras. Arguidu Agostinho buti lezadu nia kakorok dala ida kauza lezadu sofre moras iha kakorok no arguidu Mateus Colo uza fatuk ida tuku lezadu dala ida iha matan fukun kauza kanek, ran no sofre moras. Kazu ne'e aneksa ho relatóriu médiku husi Sentru Saúde Oesilo no fotografia husi polísia.

Prokuradór akuza arguidu na'in tolu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa.

Produsaun ba prova sira

Iha julgamentu, arguidu sira nega hotu faktu sira iha akuzasaun prokuradór nian. Arguidu Agostinho deklara katak iha kalan ne'e lezadu la'o tuir estrada hamutuk ho nia feen no lezadu hakilar no tolok arguidu Agostinho. Hafoin arguidu Agostinho rona lezadu nia tolok ne'e mak arguidu la'o sai mai iha estrada no husu tuir ba lezadu. Iha momentu ne'e, derepente deit lezadu sama kona tahu iha estrada ninin no monu tun rezulta nia reen-toos kanek. Arguidu Agostinho hatutan katak laiha ema ida mak baku lezadu no lezadu ho kondisaun lanu todan. Entretantu, arguidu Abilio ho Mateus deklara katak sira la hatene akontesimentu tanba iha kalan ne'e tempu udan no sira na'in rua tur iha uma laran no haree hela televizaun.

Lezadu deklara katak loos duni iha kalan ne'e lezadu hakilar duni maibé la temi arguidu Agostinho nia naran. Arguidu Agostinho la'o sai mai estrada no husu kedas lezadu no hamutuk ho arguidu sira seluk haloagresaun hasoru lezadu hanesan haktuir iha akuzasaun. Depoizde akontesimentu ne'e lezadu ba kedas iha Sentru Saúde Oesilo hodi halo tratamentu ba nia kanek.

Testemuña MS nu'udar lezadu nia feen depoimenta katak loos duni arguidu sira mak baku lezadu no lezadu hakilar duni maibé la temi ema ida nia naran. Testemuña haktuir katak depoizde akontesimentu testemuña mak lori lezadu ba halo tratamentu iha Sentru Saúde Oesilo.

Testemuña Batista Tabes nu'udar arguidu nia viziñu depoimenta katak loos duni arguidu hakilar tuir dalan tolok no temi duni arguidu Agostinho nia naran. Testemuña hatutan katak laiha ema ida mak baku lezadu maibé lezadu rasik mak monu tanba udan no tahu namdoras.

Alegasaun final

Prokuradór fiar katak arguidu komete duni krime hasoru lezadu no konfirmadu ho relatóriu médiku no fotografia husi polísia mezmu iha audénsia julgamentu arguidu sira nega hotu faktu sira iha akuzasaun. Tanba ne'e husu ba tribunál atu kondena arguidu na'in rua ho pena prizaun tinan rua fulan neen no suspende ba tinan tolu. Enkuantu arguidu Mateus Colo momentu foin mak kompleta idade tinan 14 nune'e prokuradór husu atu absolve arguidu husi akuzasau ne'e tanba tuir artigu 20 KP konsidera arguidu laiha responsabilidade kriminál ka inimputabilidade tanba nia idade.

Entretantu defeza husu ba tribunál atu absolve arguidu na'in rua ba aktu krime ne'e tanba defeza konsidera lezadu no testemuña Maria Samamo hamosu dúvida atu tribunál deskobre verdade maibé karik tribunál iha hanoin seluk no husu atu aplika pena ne'ebé kmaan ba arguidu na'in rua. Ba arguidu Mateus Colo, defeza konkorda ho pedidu alegasaun husi prokuradór tanba arguidu sei minoridade.

Desizaun

Depoisde avalia no tetu faktu sira hotu, tribunál prova katak arguidu Abilio tuku lezadu dala tolu iha hirus matan kauza lezadu sofre moras. Arguidu Agostinho buti lezadu nia kakorok dala ida kauza lezadu sofre moras iha kakorok no arguidu Mateus Colo uza fatuk ida tuku lezadu dala ida iha matan fukun kauza kanek, ran no sofre moras. Bazeia ba prova sira ne'e no tetu ba sirkunstánsia agravante no atenuante sira ne'ebé asociadu iha krime ne'e, tribunál kondena arguidu Abilio no Agostinho ho pena prizaun tinan ida suspende tinan ida. Entretantu ba arguidu Mateus Colo, tribunál absolve husi aktu krime tanba iha momentu ne'ebá arguidu foin halo idade tinan 13 fulan 4 no tuir artigu 20 KP kona-ba inimputabilidade tanba idade (seidauk kompleta tinan 16).

16. Krime explorasaun ba jogo ilísitu

Nú. Prosesu	: 0010/19.OEOSL
Kompozisaun Tribunál	: Singulár
Juis	: Dr. Eusébio Xavier Vitor
Prokuradór	: Dr. Matias Soares
Defeza	: Dr. Marcelino Marques Coro
Desizaun	: Pena prizaun maibé suspende

Iha 23 Janeiro 2020, Tribunál Distritál Oekusi prezide julgamentu leitura sentensa ba krime explorasaun ba jogo ilísitu ne'ebé envolve arguidu Jacinto Sufa, Ajelio Siqui no Fernando Soares Elu hasoru lezadu (Estadu Timor-Leste), iha Suku Uitasae Sub-distritu Oesilo Distritu Oekusi.

Akuzasaun Prokuradór

Prokuradór akuza arguidu sira katak iha 30 Maiu 2019, iha oras tuku 14:00 meiodia, arguidu Jacinto Sufa nu'udar patraun *bola guling* no arguidu na'in rua seluk hanesan ajudante. Iha loron hanesan, arguidu sira sein dokumentu legál loke *bola guling* iha Merkadu Pune hodi hetan lukru. Arguidu sira nia hahalok ne'e hamosu prezuiju ba Estadu RDTL tanba la hetan reseitas doméstika.

Prokuradór akuza arguidu sira kontra artigu 322 KP kona-ba krime explorasaun ba jogo ilísitu ho moldura penál to'o tinan 3 prizaun ka multa.

Produsaun ba prova sira

Iha julgamentu, arguidu sira konfesa faktu hotu iha akuzasaun no deklar katak arrepende ona sira nia hahalok, primeiravés halo krime no mai hatan iha tribunál. Arguidu sira promete sei la halo tan hahalok ne'e iha future. Arguidu sira mós deklar katak sira nu'udar argrikultór, laiha rendimentu fiksi no arguidu sira mesak oan na'in hotu.

Bazeia ba pedidu husi prokuradór no tribunál presinde depoimentu testemuña husi polísia tanba arguidu sira konfesa faktu hotu iha akuzasaun.

Alegasaun finál

Prokuradór konsidera arguidu na'in tolu ne'e provadu prátika krime explorasaun ba jogo ilísitu hodi hamosu prezuiju ba Estadu RDTL. Tanba ne'e, husu ba tribunál atu kondena arguidu Jacinto Sufa ho pena prizaun tinan ida fulan neen suspende ba tinan rua no arguidu na'in rua seluk husu atu kondena ho pena prizaun tinan ida suspende ba tinan ida.

Entretantu defeza husu ba tribunál atu kondena arguidu na'in tolu ho pena ne'ebé kmaan ho konsiderasaun katak iha produsaun ba prova arguidu na'in tolu konfesa integralmente ba faktu sira, arrepende ona sira nia ninia hahalok no promote sei la halo tan krime iha futuro. Arguidu sira mós foin primeiravés halo krime no mai hatan iha tribunál no arguidu sira mesak kaben na'in hotu no ida-idak iha oan ona.

Desizaun

Depoizde avalia faktu sira ne'ebé prodús iha julgamentu, tribunál prova katak arguidu Jacinto Sufa nu'udar patraun *bola guling* no arguidu na'in rua seluk hanesan ajudante sein dokumentu legál ruma loke *bola guling* iha Merkadu Pune hodi hetan lukru. Bazeia ba prova sira ne'e no tetu mós ba sirkunstánsia agravante no atenuante sira hotu, tribunál konklui prosesu ne'e no kondena arguidu Jacinto Sufa ho pena prizaun tinan ida suspende ba tinan tinan ida fulan neen. Ba arguidu na'in rua seluk, tribunál kondena sira ho pena prizaun fulan neen suspende ba tinan ida.

Atu hetan informasaun kompleitu, favor kontaktu:

Casimiro dos Santos

Diretór Ezekutivu JSMP Interino

E-mail: casimiro@jsmp.tl

Telefone: 3323883 | 77257466

Website: jsmp.tl/